



教師組 | 詩 第二名
臺灣閩南語

曾文溪記事——萬歲山源頭

無愛佇這處偏僻的山頭
屈守萬年
對兩千五百公尺懸高傲的姿態
你一路無回獨行而下

你用耐性
說服強硬的石頭放棄
重重的阻擋
你用決心
化解固執的樹林收起
苦苦的糾纏
你毋願屈服的勇氣
突破水庫銅牆鐵壁的封鎖
立場堅定的態度
脫離攔砂壩橫行霸道的刁難
有時你暗暗偷笑
笑伊堤防 虛偽無能的模樣
有時冷冷觀看
看伊圳溝 欣羨自卑的表情
就算風雨
不時擾亂你的心情
就算糞埖
沿路抹烏你的名聲
你全款無怨無悔
過程雖然坎坷波折
方向毋捌迷失改變

想欲見證人生的起落
全無留戀

向一百四十公里遠生份的路途
你暝日無停奔波前去

行入高山族的部落
巴沙娜 特富野 達邦 達娜伊的溪谷
亞米雅娜 塔乃庫 覓鴉翼的峭壁
普雅女 烏奇哈 托亞奇伊 茶山珈瑪的水沖
美麗的景色
陪伴你 旅途的孤單
行過平埔族的番社
茄拔 噍吧呷 大匏崙 馬斗欄的夜祭
隙仔口 目加溜灣 拔仔林的牽曲
麻豆 直加弄 漚汪 蕭壠的走鏢
熱情的歌聲
安慰你 心內的寂寞
行到漢人的庄頭
風吹嶺的日出
三跤石的炊煙
走馬瀨的茫霧
葫蘆谷的彩霞
馬頭山的天星
鹿耳門的月娘
溫柔的人情
治療你 滿身的傷痕
為著走揣性命的出口
費盡苦心
佇一千兩百平方公里闊崎嶇的土地
你四界流浪無閒查探

上北
你問覓鴉伶飛鼠
天的腹腸到底有佷闊
你問山豬伶野鹿
山的憂愁到底有佷深
你問鮑魚伶鱸鰻
江湖的冷暖到底是啥款的滋味
落南
你問薊桐伶斑芝
為啥物 春天一來面就紅
你問埔姜伶管芒
是按怎 秋天一到頭就白
你問椶葉狗尾草伶山棕

敢知影 風颳大雨哪會遐爾歹性地
最後
只有行向日頭落去的西片
問過稻田 蔗園伶魚塭
問過鹽埕 蚵棚伶瀉湖
佇烏面枋栝(lā-pue)的搖頭旁觀之下
大海總算出面 共你
收留 埋葬

創作理念

曾文溪發源佇阿里山脈的萬歲山頭，源頭海拔高2440公尺。流過台南縣十個鄉鎮，佇七股鄉流入台灣海峽，全長138.5公尺，流域面積1176.7平方公尺。曾文溪會當講是台南縣母親的河。豐富的水源、美麗的風景、多樣的生態，養育這塊土地、美化這塊土地、也守護這塊土地。身為台南縣土生土長的一份子，就親像伊生養的子女全款，既用食水思源頭的心情，寫這首詩獻予伊。

陳正雄

國立臺南一中社會科教師

